

**Sumáriu Kazu****Tribunál Distritál Suai****Periódú Julu 2018**

**Afirmasaun:** Sumáriu Kazu ne'e deskreve faktú sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

**A. Sumáriu prosesu julgamentu kazu iha Tribunál Distritál Suai****1. Totál kazu ne'ebé JSMP monitoriza : 47**

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	17
Artigu 154 KP no konjuga ho artigu 2, 3, no 35(a) no 36 LKVD	Maus tratus ba kónjuje	2
Artigu 177 KP	Abuzu seksuál ba menór	1
Artigu 171 no 173 (d) KP	Koasaun seksuál ho agravausaun	2
Artigu 23, 138 KP	Tentativa omisídiu simples	1
Artigu 138 KP	Omisídiu simples	1
Artigu 140 KP	Omisídiu neglijente	2
Artigu 141 KP	Interrupsaun ba gravidéz	1

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Artigu 225 KP	La halotuir obrigasaun alimentár	4
Artigu 252 pontu 1 (a & e) KP	Furtu agravadu	2
Artigu 251 KP	Furtu simples	1
Artigu 258 KP	Danu simples	2
Artigo 266 KP	Burla simples	1
Artigu 145 KP	Ofensa ba integridade fízika simples	6
Artigu 316 KP	Kontrabandu	3
Artigu 157 KP	Ameasa	1
<b>Totál</b>		<b>47</b>

## 2. Totál desizaun ne'ebé JSMP monitoriza : 32

Tipu Pena	Númeru
Pena prizaun	3
Suspensaun ba prizaun nia ezekusaun (artigu 68 KP)	14
Prizaun nia suspensaun ho devér (artigu 69 KP)	1
Pena multa (artigu 67 KP)	1
Omologa dezisténsia keixa (artigu 262 KPP)	11
Absolve	2
<b>Totál</b>	<b>32</b>

## 3. Total kazu sira ne'ebé adia tuir JSMP nia monitorizasaun : 5

Razaun adiamentu	Númeru
Lezada no testemuña la marka prezensa	1
Arguidu no lezada la marka prezensa	1
<b>Totál</b>	<b>2</b>

## 4. Totál kazu sira ne'ebé sei kontinua tuir JSMP nia monitorizasaun : 10

### B. Deskripsaun sumariu ba desizaun kazu sira ne'ebé JSMP monitoriza:

#### 1. Krime koasaun seksuál ho agravasaun

Nú. Prosesu : 0087/16.BBMLV  
Kompozisaun Tribunál : Koletivu  
Juis : Dra. Florensia Freitas, Dr. Nasson Sarmiento no Dr. Samuel da Costa Pacheco  
Prokuradór : Dr. Ricardo Leite Godinho  
Defeza : Dr. Manuel Amaral  
Tipu pena : Absolve

Iha 03 Jullu 2018, Tribunál Distritál Suai prezide leitura akordaun ba krime koasaun seksuál ho agravasaun ne'ebé envolve arguidu MP hasoru lezada MNA ho idade tinan 16 nu'udar nia viziña, iha Distritu Bobonaro.

### **Akuzasaun Prokuradór**

Prokuradór akuza katak iha 15 Juñu 2016, arguidu ba iha lezada nia uma no hosi janela arguidu hare lezada dada (*catok*) hela fuuk. Arguidu husu bee malirin ba lezada atu hemu nune'e lezada haruka arguidu tama ba foti deit iha uma laran. Arguidu tama ba iha lezada nia uma laran no foti bee malirin hodi hemu. Arguidu hateten ba lezada katak se lezada hakarak dada fuuk iha salon, arguidu sei fó osan, maibé lezada rejenta. Iha momentu ne'ebá lezada ho nia subriñu ida mesak deit iha uma tanba lezada nia família sira seluk ba tiha hotu Dili no lezada nia subriñu ne'e hariis hela iha hariis-fatin.

Maske lezada rejenta maibé arguidu husu nafatin ba lezada katak lezada hakarak osan ka lae, atu nune'e arguidu ba foti osan iha nia uma. Lezada nafatin lakohi no husu fila fali ba arguidu katak osan ne'e atu halo saida.

Hafoin arguidu fila ba nia uma no la kleur deit mai fali iha lezada nia uma ho osan US\$100.00 ho intensaun atu entrega ba lezada. Maibé lezada kontinu rejenta atu simu osan ne'e no husu ba arguidu katak tanba-sa arguidu hakarak fó osan ba nia. Arguidu hatan katak nia mak hakarak fó deit.

Aleinde ne'e, arguidu mós promete ba lezada katak nia sei fó tan osan ba lezada bainhira nia saláriu tama ona. Lezada nafatin la simu osan ne'e no hamrik la'ó ba ense bee manas iha termos. Bainhira lezada hamrik la'ó ne'e, arguidu tuir hosi lezada nia kotuk no kaer lezada nia kidan dala ida. Lezada la simu no hasé kedas arguidu katak nia la gosta arguidu kaer nia isin. Lezada ense hotu tiha bee manas refere, lezada kontinua dada nia fuuk no iha momentu lezada dada nia fuuk ne'e, arguidu tenta atu kaer lezada nia hirus-matan parte karuk maibé la konsege kaer tanba lezada hisik tiha arguidu nia liman. Aktu ne'e, halo lezada tauk no trauma. Arguidu mós husu ba lezada atu la fó hatene ba nia feen no lezada nia família.

Iha momentu ne'ebá lezada ho nia subriñu mesak iha uma tanba lezada nia família sira seluk ba tiha hotu Dili no lezada nia subriñu ne'e hariis hela.

Prokuradór akuza arguidu kontra artigu 171 KP kona-ba koasaun seksuál ho moldura penál hosi tinan 2 to'ó 8 prizaun, konjuga ho artigu 173 (d) KP kona-ba agravasaun tanba lezada nia idade kiik liu tinan 17.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun katak nia ba duni iha lezada nia uma no husu bee malirin ba lezada. Maibé arguidu rejenta lori osan atu fó ba

lezada no laiha intensaun atu hanoin aat ba lezada. Arguidu deklara katak nia kaer duni lezada nia kidan maibé la'os ho intensaun aat, maibé kaer bain-bain hanesan alin tanba sira hela viziñu. Arguidu mós deklara katak nia foin primeiravés hatan iha tribunál. Iha parte seluk, lezada kontinua reforsa akuzasaun hosi prokuradór no deklara katak arguidu iha intensaun aat ba lezada.

### **Alegasaun final**

Prokuradór konsidera arguidu komete duni krime hasoru lezada tuir faktu sira iha akuzasaun. Tanba ne'e, prokuradór husu ba tribunál atu kondena arguidu ho pena prizaun maibé suspende ninia ezekusaun.

Enkuantu, defeza husu ba tribunál atu absolve arguidu tanba konsidera arguidu ninia hahalok la prenxe rekezitu sira hosi krime koasaun seksuál.

### **Desizaun**

Depoide avalia faktu sira ne'ebé prodús durante julgamentu, tribunál konklui katak arguidu la prova komete krime koasaun seksuál hasoru lezada. Bazeia ba konkluziun ne'e, tribunál absolve arguidu hosi akuzasaun prokuradór.

## **2. Krime ofensa ba integridade física simples ho natureza violência doméstica**

Nú. Prosesu	: 0078/17.CVSUI
Kompozisaun Tribunál	: Singulár
Juis	: Dr. Argentino Luisa Nunes
Prokuradór	: Dr. Napoleão da Silva
Defeza	: Dr. Albino de Jesus Pereira
Tipu pena	: Pena prizaun tinan 1 suspende ba tinan 2

Iha 06 Jullu 2018, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu LC hasoru nia feen, iha Distritu Covalima.

### **Akuzasaun Prokuradór**

Prokuradór akuza katak iha 04 Outubru 2017, arguidu buti lezada nia kakorok no lori ai-pedasuk ida baku dala ida iha lezada nia kabaas parte loos no rezulta bubu no moras maka'as. Arguidu kontinua buti lezada nia kanuruk, dudu lezada ba rai no tuur tiha iha lezada nia kotuk laran. Aktu hirak ne'e rezulta lezada sofre moras iha kotuk-laran no moras maka'as iha kanuruk. Arguidu diskonfia lezada iha relasaun amante ho mane seluk, nune'e sira diskute malu no rezulta agresaun hirak-ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira katak la tuur iha lezada nia kotuk-laran maibé rekoñese katak nia buti duni lezada nia kakorok no kanuruk no lori ai-pedasuk baku lezada tanba lezada lori kadeira baku uluk arguidu no lori tudik atu sona arguidu.

Iha parte seluk, lezada kontinua konfirma faktu sira iha akuzasaun. Lezada mós deklarata katak nia la halo asaun ruma uluk hasoru arguidu hanesan saída mak arguidu deklarata ba tribunal inklui la lori kadeira baku no la lori tudik atu sona arguidu.

### **Alegasaun final**

Prokuradór haktuir katak arguidu konfesa parsialmente ba faktu sira iha akuzasaun. Tanba ne'e maske arguidu arrepende ninia hahalok no foin primeiravés komete krime maibé husu ba tribunal atu aplika pena prizaun tinan rua suspende ba tinan tolu nu'udar prevensaun jerál atu arguidu la repere ninia hahalok ne'e iha futuru.

Aleinde ne'e, defeza husu ba tribunal atu aplika pena prizaun maibé suspende ninia ezekusaun tanba konsidera arguidu arrepende ona ninia hahalok no foin primeiravés hatan iha tribunal.

### **Desizaun**

Depoide avalia faktu sira ne'e, tribunal prova katak arguidu komete duni krime ne'e bazeia ba faktu sira hosi akuzasaun. Tribunal konklui prosesu ne'e no kondena arguidu ho pena prizaun tinan ida suspende ba tinan rua inklui selu kustu judisiál US\$20.00.

### **3. Krime ofensa ba integridade fízika simples ho natureza violénsia doméstika**

Nú. Prosesu	: 0063/17.CVSUI
Kompozisaun Tribunal	: Singulár
Juis	: Dr. Argentino Luisa Nunes
Prokuradór	: Dr. Ricardo Leite Godinho
Defeza	: Dr. Albino de Jesus Pereira
Tipu pena	: Pena multa US\$60.00

Iha 09 Jullu 2018, Tribunal Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CMM hasoru nia feen, iha Distritu Covalima.

### **Akuzasaun Prokuradór**

Prokuradór akuza katak iha 11 Setembru 2017, maizumenus iha tuku 18.00 lokraik, arguidu tuku dala ida iha lezada nia kakorok no dulas lezada nia isin halo lezada monu ba rai. Bainhira lezada

monu ba rai, arguidu kaer lezada nia ain rua no rasta iha rai. Aktu hirak ne'e rezulta kanek no bubu iha lezada nia kotuk-laran.

Antes ne'e, lezada husu ba arguidu kona-ba tali akar ne'ebé atu uza hodi koa tua-sabu maibé arguidu hatan ba lezada katak lezada la presiza hatene kona-ba tali akar ne'e. Lezada la kontente ho arguidu nia resposta ba lezada nia pergunta, lezada foti fore musan iha lafatik-laran no fakar tiha ba rai, nune'e, sira diskute malu no mosu agresaun hirak-ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira hotu iha akuzasaun no deklarata katak arrepende ninia hahalok. Arguidu mós deklarata katak diak malu ona ho lezada no promete ba tribunál katak sei la komete tan krime hasoru lezada ka ema seluk iha futuru.

Iha parte seluk, lezada kontinua konfirma faktu sira iha akuzasaun no konfirma ho arguidu nia deklarasaun katak sira diak malu ona no to'ó agora arguidu la baku ona lezada.

### **Alegasaun finál**

Prokuradór mantein nia akuzasaun tanba arguidu prova komete krime hasoru lezada, nune'e prokuradór husu ba tribunál atu kondena arguidu ho pena ne'ebé adekua ba arguidu.

Aleinde ne'e, defeza mós husu ba tribunál aplika pena ne'ebé adekua ba arguidu tanba tetu ba sirkunstánsia atenuante sira hanesan arguidu konfesa, arrepende ninia hahalok, foin primeiravés hatan iha tribunál no promete ona katak sei la komete tan krime hasoru lezada iha futuru.

### **Desizaun**

Tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál kondena arguidu ho pena multa US\$60.00 ne'ebé sei selu gradualmente US\$ 0.50 kada loron durante loron 120. Tribunál mós kondena arguidu selu kustu judisiál US\$10.00. Bainhira arguidu la selu pena multa ne'e, arguidu sei kumpri iha prizaun durante loron 60 nu'udar pena alternativa.

## **4. Krime ofensa ba integridade fízika simples ho natureza violénsia doméstika**

Nú. Prosesu	: 0020/17.ANMBS
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Matias Soares
Defeza	: Dr. Manuel Amaral
Tipu pena	: Pena prizaun fulan 4 suspende ba tinan 1

Iha 10 Jullu 2018, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CdS hasoru nia feen, iha Distritu Ainaro.

### **Akuzasaun Prokuradór**

Prokuradór akuza katak iha 30 Dezembru 2017, arguidu lori ai-kakeu nia-sanak naruk ida kuaze sentimetru 70, baku dala lima iha lezada nia kabaas-karuuk, kotuk-laran, ain-loos no ain-karuuk. Arguidu foin mak hapara agresau ne'e, bainhira arguidu nia inan mai intervein no halo impedimentu. Aktu hirak ne'e rezulta lezada sofre bubu metan iha fatin ne'ebé hetan agresau ne'e.

Kazu ne'e akontese bainhira lezada haruka arguidu fase uluk sira nia-oan nia hena foer antes ba merkadu maibé arguidu halo kontráriu fali. Nune'e sira diskute malu iha viziñu nia uma oin, hafoin arguidu fila ba uma foti ai-kakeu hodi baku lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa totalmente ba faktu sira hotu iha akuzasaun no deklarata katak arrepende ninia hahalok. Arguidu mós deklarata katak sira dame malu ona no moris hamutuk hanesan feen ho laen.

Aleinde ne'e, lezada mós kontinua konfirma faktu sira iha akuzasaun no deklarata katak diak malu ona ho arguidu no to'o agora arguidu la baku ona lezada.

### **Alegasaun finál**

Prokuradór konsidera katak arguidu komete duni krime hasoru lezada tanba ne'e atu prevene krime ne'e la akontese tan iha futuru, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza husu ba tribunál atu aplika pena ne'ebé adekua ba arguidu tanba arguidu konfesa faktu sira hotu, arrepende ninia hahalok, foin primeiravés komete krime no promete sei la komete tan krime hasoru lezada iha futuru.

### **Desizaun**

Depoide avalia faktu provadu sira hotu, tribunál konsidera katak arguidu provadu komete duni krime hasoru lezada tuir faktu sira iha akuzasaun. Tanba ne'e, tribunál konklui prosesu ne'e no kondena arguidu ho pena prizaun fulan haat suspende ba tinan ida.

## **5. Krime abuza seksuál ba menór**

Nú. Prosesu : 0024 /15.CVZML

Kompozisaun Tribunál : Koletivu  
Juis : Dra. Florensia Freitas, Samuel da Costa Pacheco no  
Nasson Sarmiento  
Prokuradór : Dr. Ricardo Leite Godinho  
Defeza : Dr. Albino de Jesus Pereira  
Tipu pena : Pena prizaun tinan 18

Iha 12 Jullu 2018, Tribunál Distritál Suai prezide leitura akordaun ba krime abuzu seksuál<sup>1</sup> ba menór ne'ebé envolve arguidu JA hasoru lezada FMB ho idade foin tinan 12, iha Distritu Covalima.

### **Akuzasaun prokuradór**

Prokuradór akuza katak maisumenus, iha tinan 2015, lezada ba asiste televizaun iha arguidu nia uma. Iha ne'ebá arguidu bolu no bosok tiha lezada atu tau ai-moruk ba lezada nia fuuk halo naruuk, nune'e arguidu lori lezada ba iha arguidu nia kintál-laran iha lutu-hun. Maibé depois arguidu hasai lezada nia kalsa, nahe faru ida iha rai, buti lezada nia ibun no halo relasaun seksuál ho lezada. Arguidu ameasa lezada atu la bele fó hatene ba ema seluk. Aktu ne'e, halo lezada sofre ran sai barak no halo lezada la'o ladiak.

Iha kalan tuir mai kedas, lezada atu ba asiste tan televizaun iha arguidu nia uma, maibé arguidu hein ona lezada iha dalan no dada lezada ba kintál-laran. Arguidu nahe karón ida no hatoba lezada iha karón leten no halo relasaun seksuál ho lezada.

Iha kalan ba dala tolu no dala haat, arguidu aproveita nafatin kalan bainhira lezada atu ba hare televizaun iha arguidu nia uma, no aproveita mós arguidu nia feen laiha uma, arguidu bolu lezada no halo relasaun seksuál ho lezada. Depoisde halo relasaun hotu, arguidu haruka lezada ba asiste televizaun iha arguidu nia uma.

Depoisde ne'e, iha 04 Dezembru 2015, maizumenus tuku 11:00 kalan lezada asiste hela televizaun no arguidu nia-feen toba hela iha sala ne'e. Arguidu nia-feen hare (la moos), maibé nia hare hanesan arguidu ko'us lezada tama ba iha kuartu-laran no halo relasaun seksuál ho lezada. Maibé arguidu nia-feen la brani husu tuir tanba nia tauk arguidu sei komete krime ba nia tanba antes ne'e arguidu sempre komete ona krime hasoru nia-feen.

Maisumenus iha 16 Dezembru 2015, bainhira arguidu la iha uma, arguidu nia-feen foin husu ba lezada kona-ba akontesementu relasiona ho arguidu nia-feen diskonfia arguidu ko'us lezada ba kuartu-laran. Iha momentu ne'ebá lezada hatan ba arguidu nia-feen katak arguidu ko'us nia ba kuartu-laran no haruka lezada kolu kalsa hodi halo relasaun seksuál. Kazu ne'e foin relata ba

---

<sup>1</sup> Kazu ne'e halo fali rejulgamentu tanba membru juis koletivu ida hakotu-iis antes asina desizaun ba kazu ne'e.



polísia bainhira komete violénsia doméstika hasoru nia feen iha 19 Dezembru 2015. Iha momentu ne'ebá arguidu nia feen aliende hato'o keixa iha polísia ba kazu violénsia doméstika<sup>2</sup>, arguidu nia-feen aproveita hato'o mós keixa ba kazu violasaun seksuál hasoru lezada.

Prokuradór akuza, arguidu kontra artigu 177(1) KP kona-ba abuzu seksuál ba menór ho moldura penál hosi tinan 5 to'o 20 prizaun, konjuga ho artigu 41 KP kona-ba krime kontínuadu.

### **Produsaun ba prova sira**

Iha prosesu julgamentu, arguidu nega ba faktu sira ne'ebé prokuradór akuza hasoru nia no deklarata katak nia la halo relasaun seksuál ho lezada. Arguidu rekoñese katak nia kaer no buti lezada nia hirus-matan no mós kaer lezada nia vajina. Arguidu mós deklarata katak kazu ne'e sira rezolve ona tuir lisan Timor nian no arguidu entrega osan US\$1,250.00 ba lezada no família.

Enkuantu, lezada kontinua reforsa akuzasaun prokuradór nian maibé deklarata katak relasaun seksuál akontese tuir loloos dalaualu. Lezada hatutan katak akontesimentu segundu to'o dalawalu ne'e laiha ameasa no lezada rasik mak hakarak ba asiste televizaun iha arguidu nia uma. Aleinde ne'e lezada mós konfirma ho deklarasaun arguidu nian katak kazu ne'e sira rezolve ona tuir lisan Timor nian no arguidu entrega duni osan US\$1,250.00 ba lezada nia família.

Testemuña JdR nu'udar arguidu nia feen depoimenta katak nia la hare ho matan relasaun seksuál ne'e, maibé testemuña deskobre kazu ne'e bainhira nia deskonfia iha kalan ida arguidu hanesan ko'us lezada ba quarta no nia husu tuir lezada mak lezada konta sai ba nia katak arguidu halo relasaun seksuál ho nia. Hafoin ida-ne'e, tanba arguidu mós komete krime violénsia doméstika hasoru testemuña nune'e, ba halo keixa ba kazu violénsia domestika no kazu abuzu seksuál ba lezada. Depois testemuña lori lezada ba iha ospital no rezultadu médiku relata halo ezaminasaun mediku no relata katak iha sinal kona-ba relasaun seksual ne'ebé akontese ona ba lezada.

### **Alegasun final**

Prokuradór konsidera katak arguidu komete duni krime hasoru lezada. Tanba ne'e, bazeia ba lezada nia deklarasaun no relatóriu médiku, prokuradór husu ba tribunál atu kondena arguidu ho pena prizaun tinan neen.

Iha parte seluk, defeza konsidera arguidu la halo relasaun seksuál ho lezada, apenas kaer no buti hirus-matan no kaer lezada nia vajina. Tanba ne'e, defeza konsidera arguidu ninia hahalok la prenxe rekezitu sira hosi krime abuzu seksuál ba menór. Bazeia ba konsiderasaun ne'e, defeza husu ba tribunál atu aplika pena ne'ebé justu no adekuaudu ba arguidu.

---

<sup>2</sup> Akuzasaun ba kazu violénsia doméstika hasoru arguidu nia-feen sei iha prosesu nia-laran hela. Polisia hola iniciativa atu prosesa uluk kazu abuzu seksuál hasoru lezada tanba konsidera lezada sei ho idade menoridade.

## **Desizaun**

Depoisde avalia faktu sira ne'ebé prodús durante julgamentu, tribunál konklui katak arguidu provadu komete duni relasaun seksuál ho lezada hamutuk dala-walu. Tribunál la hetan prova katak arguidu uja forsa no ameasa hasoru lezada durante komete relasaun seksuál ne'e, tanba tribunál bazeia ba deklarasaun lezada nian katak arguidu la uza forsa no ameasa. Tribunál mós avalia faktu sira kona-ba lezada kontinua ba asiste televizaun iha kalan tutuir-malu depoisde akontesimentu ne'e. Maibé tanba lezada sei ho idade menór (tinan 12), nune'e tribunál konklui prosesu ne'e no kondena arguidu ho pena prizaun tinan 18.

## **6. Krime ofensa ba integridade fízika simples**

Nú. Prosesu : 0006/18.CVMCT  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Ricardo Leite Godinho  
Defeza : Dr. Albino de Jesus Pereira  
Tipu Pena : Omologa pedidu dezisténsia keixa

Iha 12 Jullu 2018, Tribunál Distritál Suai prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Jezinho Celestino do Carmo hasoru lezadu Americo Moniz, iha Sub-distritu Maukatar, iha Distritu Covalima.

### **Akuzasaun Prokuradór**

Prokuradór akuza katak iha 08 Abril 2018, arguidu hakbesik-an ba lezadu no lori liman-karuuk buti metin lezadu nia kamija-gola no lori liman loos tuku dala ida iha lezadu nia ibun no tebe dala ida iha lezadu nia kanotak halo lezadu monu ba rai. Aktu hirak ne'e, rezulta lezadu sofre kanek no ran sai maka'as iha ibun. Arguidu komete krime ne'e tanba arguidu la simu lezadu taa tiha arguidu nia ai-horis sira.

Prokuradór akuza arguida kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fali nia-keixa ho kritéria katak arguidu tenke selu lezadu nia sofrimentu ho osan US\$100.00. Arguidu la konkorda ho montante ne'e no hakarak fó deit US\$50.00. Maibé lezadu mantein nafatin ho osan US\$100.00, nune'e iha ikus arguidu konkorda ho momente ne'ebé lezadu husu no deklara katak arrepende ona ninia hahalok. Arguidu mós promete sei la repete tan hahalok hanesan iha futuru.

## **Alegasaun final**

Prokuradór no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

## **Desizaun**

Bazeia ba pedidu dezisténsia hosi lezadu no akordu dame hosi parte sira, tribunál konklui prosesu ne'e no omologa akordu dame entre parte sira.

## **7. Krime danu simples**

Nú. Prosesu : 0010/17.CVSLL  
Kompozisaun Tribunál : Singulár  
Juis : Dr. Nasson Sarmiento  
Prokuradór : Dr. Matias Soares  
Defeza : Dr. Fransisco Qaetano Martins  
Tipu pena : Pena prizaun tinan 1 suspende ba tinan 1 fulan 6

Iha 16 Jullu 2018, Tribunál Distritál Suai prezide leitura sentensa ba krime danu simples ne'ebé envolve arguidu MdR, VX, QdS, OdF, DM, CA no AdC hasoru Manuel Amaral (lezadu) iha Distritu Covalima.

## **Akuzasaun Prokuradór**

Prokuadór akuza katak iha 02 Juñu 2017, tuku 09.00 dader, bainhira lezadu fó han nia karau sira, lezadu identifika katak nia karau balun laiha. Nune'e, iha meudia lezadu ho nia feen ba buka karau sira ne'ebé lakon ne'e no foin hetan karau hirak ne'e iha tuku 16.00 lokraik. Iha momentu ne'ebá lezadu no nia feen hare arguidu sira ko'a hela lezadu nia karau iha área Talilaran. Arguidu sira tau lasu besik iha lezadu nia to'os besik iha fatin karau tama sai ba nia luhan.

Iha 07 Juñu 2017, lezadu hetan arguidu sira ko'a tan lezadu nia karau ida ho marka Ulu no karau nia tilun naruuk. Karau ida seluk arguidu sira seidauk oho no sei kesi hela. Nune'e, lezadu no nia oan mane, dada fila tiha karau ida kesi ne'e ba uma.

Prokuradór akuza katak arguidu sira na'ok ona lezadu nia karau hamutuk 20 ona desde tinan 2013 ne'ebé sura ba osan hamutuk US\$8,000.00.

Prokuradór akuza arguidu kontra artigu 252 KP kona-ba furtu agravadu ho nia moldura penál to'o tinan 3 ka multa.

## **Produsaun ba prova sira**

Iha prosesu julgamentu, arguidu sira nega faktu sira hotu no sira deklara katak karau sira ne'ebé sira lasu ne'e laiha marka Ulu hanesan saida mak lezadu hateten. Arguidu sira mós deklara katak

karau sira ne'e na'in hosi arguidu MdR nune'e kona-ba lezadu nia karau, arguidu sira la hatene. Entretantu, lezadu kontinua reforsa faktu sira hosi prokuradór nian.

Testemuña FM nu'udar arguidu MdR nia viziñu depoimenta katak arguidu MdR iha duni karau maibé la barak hanesan lezadu nian. Entretantu kona-ba karau ne'ebé arguidu sira oho, testemuña depoimenta katak nia la hatene.

### **Alegasaun final**

Prokuradór konsidera arguidu sira komete duni krime tuir faktu sira iha akuzasaun. Tanba ne'e husu ba tribunál atu kondena arguidu sira ho pena efetiva tinan lima inklui husu atu arguidu sira selu fila fali lezadu nia karau ida ne'ebé arguidu sira oho ona.

Iha parte seluk, defeza husu ba tribunál atu absolve arguidu sira hosi prosesu ne'e tanba karau ne'ebé arguidu sira oho laiha marka hanesan lezadu hateten no karau 20 ne'ebé lakon la'os arguidu sira mak na'ok. Tanba ne'e, defeza konsidera katak arguidu sira ninia hahalok ne'e la prenxe rekezitu sira hosi krime furtu agravadu.

### **Desizaun**

Depoizde avalia faktu sira hotu, tribunál halo alterasaun ba kualifikasaun jurídiku hosi artigu 252 KP ba fali artigu 258 KP kona-ba danu simples ne'ebé ho moldura penál to'o tinan 3 ka multa. Tribunál konsidera katak arguidu sira ninia hahalok la prenxe rekezitu sira hosi krime furtu agravadu tanba arguidu sira la hatene katak karau ne'ebé sira lasu nu'udar lezadu nia karau. Maibé atu evita arguidu sira ninia hahalok atu la repete sira ninia hahalok ne'e iha futuro, tribunál kondena arguidu sira ho pena prizaun tinan ida suspende ba tinan ida fulan neen.

### **8. Krime ofensa ba integridade física simples ho natureza violéncia doméstika**

Nú. Prosesu : 0155/17. PDSUA  
Kompozisaun Tribunál : Singulár  
Juis : Dr. Argentino Luisa Nunes  
Prokuradór : Dr. Ricardo Leite Godinho  
Defeza : Albano Maia (advogadu estajiáriu)  
Tipu pena : Absolve

Iha 17 Jullu 2018, Tribunál Distritál Suai prezide leitura sentesa ba krime ofensa ba integridade física simples ho natureza violéncia doméstika envolve arguidu CB (aman) ho LCB (oan feto rasik) hasoru inan, iha Distritu Covalima.

### **Akuzasaun Prokuradór**

Prokuradór haktuir katak arguidu CB no lezada moris separa ona nu'udar feen no laen. Iha iha 27 Setembru 2017, iha tuku 19.00 kalan, lezada ba iha arguidu nia uma. Iha momentu ne'ebá arguida LCB ne'ebé nu'udar lezada ninia oan-feto ne'ebé kaben-nain dehan ba lezada katak uma ne'ebé sira hela ne'e, la'os lezada nian maibé sira nia aman nia kosar-been. Tanba ne'e, lezada

hatan ba arguida LCB katak *'ó mak inan ka ha'u mak inan'*, *ne'e mak ó atu hadau fali uma ne'e hosi ha'u'*.

Arguida la simu no foti terina matan ida tuda ba lezada maibé la kona. Bainhira lezada hakbesikan atu baku arguida, derepente arguidu CB hosi kotuk tuku dala tolu iha lezada nia kotuk-laran halo lezada monu ba rai. Liután arguida LCB rasta lezada nia faru to'o nakles. Aktu hirak ne'e, rezulta lezada sofre moras iha kotuk laran no dada is ladiak. Aleinde ne'e, arguidu CB hetan ona desizaun suspensaun ba pena prizaun ba kazu seluk ho tipu krime danu simples.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no kontra artigu 258 KP kona-ba danu simples ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, arguidu no arguida nega faktu sira hotu katak sira la baku lezada. Arguidu CB deklara katak bainhira nia fila hosi to'os, nia hare arguida LCB tanis hela. Arguidu husu tanba-sa tanis, arguida LCB hatan katak lezada mak baku. Arguidu deklara mós katak nia la halo asaun ruma hasoru lezada tanba nia iha hela suspensaun ba pena prizaun. Tanba ne'e iha momentu ne'ebá nia ba tuur halimar tiha iha nia viziñu (AB) nia uma.

Ih parte seluk, arguida LCB deklara katak lezada mak baku nia no hakuak metin nia, nune'e nia kaer lezada nia faru hodi hisik-an. Arguida mós deklara katak nia laiha intensaun atu baku lezada tanba lezada ne'e nu'udar nia inan.

Enkuantu lezada kontinua konfirma faktu sira iha akuzasaun no deklara katak antes problema ne'e, nia no arguidu separadu ona nu'udar feen no laen.

Testemuña AB depoimenta katak arguidu ba tuur halimar duni iha nia uma no derepente lezada ba no basa arguidu.

### **Alegasaun finál**

Prokuradór konsidera faktu sira iha akuzasaun no lezada nia deklarasaun. Bazeia ba konsiderasaun ne'e, husu ba tribunál atu fó pena ne'ebé adekuadu ba arguidu sira.

Iha parte seluk, defeza husu ba tribunál atu absolve arguidu CB no arguida LCB hosi akuzasaun prokuradór nian tanba konsidera katak arguidu sira la komete krime hasoru lezada.

### **Desizaun**

Depoizde avalia faktu sira hotu, tribunál absolve arguidu CB no arguida LCB hosi akuzasaun prokuradór tanba tribunál konsidera arguidu sira la komete krime ruma hasoru lezada.

## **9. Krime la halotuir obrigasaun alimentár**

Nú. Prosesu : 0193/16.PDSUA  
Kompozisaun Tribunál : Singulár  
Juis : Dra. Florensia Freitas  
Prokuradór : Dr. Napoleão da Silva Soares  
Defeza : Dr. Albano Maia (advogadu estajiáriu)  
Tipu pena : Omologa dezisténsia keixa

Iha 24 Jullu 2018, Tribunál Distritál Suai liuhosi tribunál movel iha Distritu Bobonaro prezide leitura sentesa ba krime la halotuir obrigasaun alimentár ne'ebé envolve arguidu AdS hasoru nia oan no feen, iha Distritu Bobonaro.

### **Akuzasaun Prokuradór**

Prokuradór akuza katak iha tinan 2015, arguidu no lezada diskute malu no arguidu sai tiha hosi uma no nunka fila ba uma no la fó alimentasaun ba nia oan nain ida ne'ebé sei idade menoridade.

Prokuradór akuza arguidu kontra artigu 225 KP kona-ba la halotuir obrigasaun alimentár ne'ebé ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, arguidu rekoñese ninia hahalok no promete katak nia sei halotuir obrigasaun alimentár ba nia oan. Arguidu prontu atu fó osan US\$30.00 kada fulan ba nia oan. Iha parte seluk, lezada konkorda ho montante refere no hakarak dezisté tiha keixa hasoru arguidu.

### **Alegasaun finál**

Prokuradór no defeza konkorda ho akordu ne'ebé parte rua decide ona no husu atu absolve arguidu.

### **Desizaun**

Bazeia ba akordu dame hosi parte sira no arguidu ninia komprimisu atu kumpre nia obrigasaun alimentár ba nia oan no pedidu dezisténsia hosi lezada, tribunál omologa prosesu ne'e.

## **10. Krime ofensa ba integridade fízika simples**

Nú. Prosesu : 0011/18.PDSUA  
Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. João Marques  
Defeza : Dr. Albino de Jesus Pereira  
Tipu Pena : Omologa pedidu dezisténsia keixa

Iha 24 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba krime ofensa ba integridade fízika simples ne'ebé envolve arguidu DFC hasoru nia namorada, iha Distritu Bobonaro.

### **Akuzasaun Prokuradór**

Prokuradór akuza arguidu katak iha 02 Fevereiru 2017, arguidu foti *stik biliard* ida baku iha lezada nia ain-tuur dala ida no liman dala ida no rezulta moras no bubu iha ain-tuur no liman.

Antes ne'e, lezada ba iha arguidu nia uma no husu ba arguidu kona-ba feto ne'ebé arguidu tula liuhosi lezada nia uma oin. Arguidu hatan ba lezada katak nia tula nia kolega. Bainhira sira sei koalia hela ne'e, arguidu simu telefone no koalia ses tiha hosi lezada. Tanba ne'e sira diskute malu to'o mosu agresau ne'e.

Liutiha ida-ne'e, iha 28 Novembru 2017, iha Merkadu Maliana, lezada ho nia inan-kiik (MI) ba han bakso iha restaurante ida no hare arguidu no feto ida han mós bakso iha fatin ne'e. Tanba ne'e, lezada husu ba arguidu no arguidu hatan katak feto ne'e nia doben no kaer lezada nia liman hodi hamrik. Lezada la simu no basa dala ida iha arguidu nia hasan loos dala ida. Arguidu mós basa dala rua iha lezada nia hasan-karuuk, buti lezada nia kakorok no dada sai lezada hosi restaurante laran. Arguidu kontinua basa dala ida iha lezada nia hasan-loos no hateten ba lezada katak labele halo nia moe. Aktu hirak ne'e, rezulta lezada sofre moras no bubu iha hasan no kakorok.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dada fali keixa ho kritéria katak arguidu tenke taka nia moe ho osan US\$100.00. Arguidu konkorda ho pedidu ne'e no entrega kedas osan US\$ 100.00 ba lezada. Arguidu arrende nia sala no promete sei la halo tan krime ne'e iha futuru hasoru lezada no ema seluk.

### **Alegasaun finál**

Prokuradór no defeza konkorda ho akordu dame ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba pedidu dezisténsia hosi lezada no akordu dame hosi parte sira, tribunál konklui prosesu ne'e no omologa akordu dame entre parte sira.

## **11. Krime ofensa ba integridade fízika simples**

Nú. Prosesu	: 0009/17.BBBBV
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Napoleão da Silva Soares
Defeza	: Dr. Albano Maia (advogadu privadu estajiáriu)
Tipu Pena	: Omologa pedidu dezisténsia keixa

Iha 24 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Luis Gomes hasoru lezadu Longuinhos de Jesus Gouveia, iha Distritu Bobonaro.

### **Akuzasaun Prokuradór**

Prokuradór akuza katak iha 13 Setembru 2017, lezadu nu'udar mestre, fila hosi eskola no bainhira to'ó iha arguidu nia uma oin, arguidu husu ba lezadu nusa mak ó haruka estudante sira ba foti fatuk iha hau nia toos-laran. Lezadu hatan ba arguidu katak alunus sira barak nune'e dala ruma foti sala fatuk sira ne'e. Depoisde hatan tiha nune'e, lezadu kontinua la'ó fila ba uma. Maibé arguidu kontinua la'ó tuir lezada nia kotuk.

Bainhira lezadu hare arguidu la'ó tuir nia, lezadu hatete ba arguidu atu tuur koalia didiak no se labarik sira foti sala fatuk hirak ne'e, bele fó fila fali. Maibé arguidu hatan ba lezadu katak se ha'u oho ó se mak atu mete. Depoisde koalia hanesan ne'e, arguidu lori ai-sar hun baku dala ida iha lezadu nia hasan-karuuk no baku dala ida iha kabaas no rezulta moras no bubu iha hasan no kabaas.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa.

### **Produsaun ba prova sira**

Antes tama ba produsaun ba prova sira, tribunál juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fali nia-keixa tanba arguidu promete sei la ameasa no baku tan lezadu. Aleinde ne'e, arguidu mós husu deskulpa ba lezadu. Arguidu konkorda ho pedidu dezisténsia hosi lezadu.

Iha prosesu konsiliaun ne'e, lezadu hakarak deziste tiha nia keixa tanba arguidu husu ona deskulpa ba lezadu no arrepende ona nia sala. Aleinde ne'e, arguidu promete sei la halo tan krime ne'e iha futuru hasoru lezadu no ba ema seluk.



### **Alegasaun final**

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

### **Desizaun**

Bazeia ba pedidu dezisténsia hosi lezadu no akordu dame hosi parte sira, tribunál konklui prosesu ne'e no omologa dezisténsia keixa ne'e.

### **12. Krime omisídiu simples**

Nú Prosesu : 0083/16 .CVSUI  
Kompozisaun Tribunál : Koletivu  
Juis : Dra. Florensia Freitas, Dr. Nasson Sarmiento no Dr. Samuel da Costa Pacheco  
Prokuradór : Dr. Napoleão Soares  
Defeza : Dr. Manuel Amaral  
Tipu Pena : Pena prizaun tinan 14

Iha 24 Jullu 2018, Tribunál Distritál Suai liuhosi tribunál movel iha Distritu Bobonaro prezide leitura akordaun krime omisídiu simples ne'ebé envolve arguidu Eusebio dos Santos hasoru lezada Octavia Moniz, iha Distritu Covalima.

### **Akuzasaun Prokuradór**

Prokuradór akuza katak iha 17 Jullu 2016, maizumenus tuku 12.00 kalan, lezada telefone ba arguidu atu hasoru malu iha lezada nia uma kotuk. Bainhira hasoru malu, lezada hatete ba arguidu katak nia isin rua fulan lima ona no arguidu tenke responsabiliza ba nia. Maibé arguidu hatan ba lezada katak la'os arguidu lakohi responsabiliza maibé lezada nia inan no aman mak lakohi arguidu namora ho lezada. Tanba ne'e, sira diskute malu no lezada rakut arguidu nia liman no hirus-matan. Arguidu tuku dala ida iha lezada nia hirus-matan halo lezada monu ba rai no baku ulun ba fatuk rezulta ran sai barak no mate iha fatin.

Prokuradór akuza arguidu kontra artigu 138 KP kona-ba omisídiu simples ho moldura penál hosi tinan 12 to'o 25 prizaun.

### **Produsaun ba prova sira**

Iha prosesu julgamentu, arguidu konfesa totalmente ba faktu sira hotu no deklara katak nia arrepende ninia hahalok. Arguidu mós deklara katak nia foin primeiravés komete krime.

### **Alegasaun final**

Prokuradór husu ba tribunál atu kondena arguidu ho pena prizaun tinan 16 tanba konsidera arguidu provadu komete krime omisídiu simples hasoru lezada.

Enkuantu defeza husu ba tribunál atu halo alterasaun jurídiku hosi artigu 138 KP ba fali iha artigu 146 KP kona-ba ofensa ba integridade fízika grave no agrava tuir artigu 147 KP no artigu 19 KP kona-ba agravausaun tanba rezultadu. Aleinde ne'e, defeza husu ba tribunál atu kondena arguidu ho pena ne'ebé adekuaudu tanba arguidu arrepende ninia hahalok no foin primeiravés komete krime ne'e.

### **Desizaun**

Depoizde avalia faktu sira hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu hirak ne'e, tribunál konklui prosesu ne'e no kondena arguidu ho pena prizaun tinan 14.

### **13. Krime ofensa ba integridade fízika simples ho natureza violénsia doméstika**

Nú. Prosesu : 0109/17. BBMLV  
Kompozisaun Tribunál : Singulár  
Juis : Dr. Samuel Pacheco  
Prokuradór : Dr. Matias Soares  
Defeza : Dr. Domingos dos Santos (advogadu privadu estajiáriu)  
Tipu pena : Pena prizaun tinan 1 suspende ba tinan 1

Iha 24 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LH hasoru nia oan feto, iha Distritu Bobonaro.

### **Akuzasaun Prokuradór**

Prokuradór akuza katak, iha 12 Novembru 2017 kalan, arguidu haruka lezada ba foti livru konta bankaria iha lezada ninia inan ne'ebé hela ona iha ninia avo ninia uma. Tanba kalan ona nune'e lezada la fila no foin fila iha dader. Bainhira to'o iha uma, arguidu hirus no basa dala rua iha lezada nia hasan-loos no karuuk. Aleinde ne'e arguidu foti fiu ida baku dala barak iha lezada nia kabaas no buti lezada nia kakorok to'o lezada laiha lian.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa parsialmente katak la buti lezada nia kakorok maibé rekoñese faktu sira seluk. Aleinde ne'e, lezada konfirma ho arguidu nia deklarasaun no deklarata katak nia perdua ona arguidu no to'o agora arguidu la baku ona lezada no ninia alin sira.

### **Alegasaun finál**

Prokuradór konsidera arguidu provadu komete krime hasoru lezada. Tuir prokuradór arguidu hanesan aman ida tenke tau matan ba nia oan sira. Tanba ne'e atu halo prevensaun ba arguidu atu la komete tan aktu ne'e hasoru lezada iha futuru, husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza husu ba tribunál atu kondena arguidu ho pena ne'ebé justu, tanba konsidera arguidu konfesa, arrepende ninia hahalok no promete sei la komete tan krime hasoru lezada iha futuru. Aleinde ne'e, lezada mós perdua ona arguidu.

### **Desizaun**

Depoide avalia faktu provadu sira, tribunál konsidera katak arguidu komete duni krime tuir faktu sira iha akuzasaun. Bazeia ba faktu provadu hirak-ne'e, tribunál kondena arguidu ho pena prizaun tinan ida suspende ba tinan ida inklui selu kustu judisiál US\$25.00.

### **14. Krime ameasa**

Nú. Prosesu	: 0070/16.BBMLV
Kompozisaun Tribunál	: Singulár
Juis	: Dra. Florensia Freitas
Prokuradór	: Dr. João Marques
Defeza	: Dr. Albano Maia (advogadu privadu estajiáriu)
Tipu pena	: Omologa pedidu dezisténsia keixa

Iha 24 Jullu 2018, Tribunál Distritál Suai liuhosi tribunál movei iha Distritu Bobonaro prezide julgamentu tentativa konsiliaun ba krime ameasa ne'ebé envolve arguidu Domingos Pereira hasoru nia feton, iha Distritu Bobonaro.

### **Akuzasaun Prokuradór**

Prokuradór akuza katak iha 24 Abril 2016, lezada no nia kuiñada diskute malu tanba lezada dehan ba nia kuiñada atu haruka nia kuiñada ne'e ninia alin-feto hamoos tiha labarik nia sintina iha fatin ne'ebé uza ba tein no fase bikan nian. Bainhira arguidu fila hosi to'ós, rona informasaun hosi nia feen kona-ba problema diskute-malu entre lezada ho arguidu nia feen, nune'e, arguidu foti katana ho ai-dona ida no duni-tuir lezada maibé la toman. Arguidu ameasa lezada katak se nia kaer toman lezada, nia sei taa fahe rua tiha lezada. Arguidu nia liafuan ne'e, halo lezada sente tauk no la hakmatek.

Prokuradór akuza arguidu kontra artigu 157 KP kona-ba krime ameasa ho moldura penál to'o tinan 1 ka multa.

### **Produsaun ba prova sira**

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu no lezada.

Iha prosesu konsiliaun ne'e, lezada hakarak dada fali nia-keixa tanba arguidu promete sei la ameasa tan lezada. Aleinde ne'e, arguidu mos husu diskulpa ba lezada no konkorda ho pedidu dezistensia hosi lezada.

### **Alegasaun final**

Prokurador no defeza konkorda ho akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba pedidu dezistensia hosi lezada no akordu dame hosi parte sira, tribunál konklui prosesu ne'e no omologa akordu dame entre parte sira.

### **15. Krime koasaun seksuál ho agravasaun**

Nú. Prosesu : 1339/11.PDSUA  
Kompozisaun Tribunál : Koletivu  
Juis : Dra. Florensia Freitas, Dr.Nasson Sarmiento no Dr.  
Samuel da Costa Pacheco  
Prokurador : Dr. Matias Soares  
Defeza : Dr. Manuel Amaral  
Tipu pena : Kondena ho pena prizaun tinan 6

Iha 26 Jullu 2018, Tribunál Distritál Suai liuhosi tribunál movei prezide leitura akordaun ba krime koasaun seksuál ne'ebé envolve arguidu ATB hasoru lezadu EMC, iha Distritu Bobobaro.

### **Akuzasaun Prokurador**

Prokurador akuza katak iha 01 Jullu 2011, arguidu nu'udar Diretor iha Eskola Pre-Sekundaria ida, haruka estudante sira halibur fatuk hodi ajuda parte igreja relasiona ho programa halo uma nian. Depoisde halibur fatuk, arguidu bolu lezadu atu ba hare kondisaun dalan atu sira bele butuk fatuk iha fatin refere. Lezadu kumpri orientasaun ne'e no ba hare dalan ne'ebé arguidu haruka. Iha momentu ne'ebá lezadu sente atu soe bee-kiik nune'e lezadu buka fatin atu soe bee-kiik.

Prokurador akuza katak bainhira lezadu loke nia kalsa atu soe bee-kiik, derepente arguidu hosi kotuk hakoak lezadu no kaer lezadu nia orgaun seksuál no halo orál. Lezadu dudu arguidu atu husik lezadu, maibé arguidu la husik. Arguidu foin husik bainhira lezadu bosok dehan ema hare hela sira.

Aktu ne'e rezulta lezadu sente moras no bubu iha nia orgaun seksuál. Lezadu la tama eskola durante loran tolu nia laran.

Prokuradór akuza arguidu kontra artigu 171 KP kona-ba koasaun seksuál ne'ebé ho moldura penál hosi tinan 2 to'o 8 prizaun, konjuga ho artigu 173 KP (d) kona-ba agravaasaun tanba lezadu nia idade kiik liu tinan 17.

### **Produsaun ba prova sira**

Iha prosesu julgamentu, arguidu konfesa faktu sira hotu no deklarata katak nia arrepende ba ninia hahalok. Arguidu deklarata mós katak nia foin primeiravés komete krime ne'e no promete sei la repete iha futuru. Entretantu, lezadu kontinua konfirma ho faktu sira iha akuzasaun.

### **Alegasaun final**

Prokuradór husu ba tribunál atu aplika pena prizaun tinan neen ba arguidu tanba arguidu nu'udar diretór eskola ida ka nu'udar edukador ida-ne'ebé tuir loloos la halo hahalok krime ne'e hasoru lezadu nu'udar nia estudante.

Enkuantu defeza husu ba tribunál atu aplika suspensaun ba pena prizaun ba arguidu, tanba konsidera sirkunstánsia atenuante sira hanesan arguidu konfesa, arrepende ninia hahalok, foin primeiravés hatan iha tribunál no promete sei la halo tan krime ne'e iha futuru.

### **Desizaun**

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu sira provadu ne'e, tribunál konklui prosesu ne'e no kondena arguidu ho pena prizaun tinan 6.

### **16. Krime la halotuir obrigasaun alimentár**

Nú. Prosesu	: 0170/17.PDSUA
Kompozisaun Tribunál	: Singulár
Juis	: Dr. Nasson Sarmiento
Prokuradór	: Dr. Napoleão da Silva Soares
Defeza	: Dr. Fernando da Costa (advogadu privadu estajáriu)
Tipu pena	: Omologa dezisténsia keixa

Iha 26 Jullu 2018, Tribunál Distritál Suai liuhosi tribunál movel iha Distritu Bobonaro prezide leitura sentesa ba krime la halotuir obrigasaun alimentár ne'ebé envolve arguidu DMG hasoru nia oan no feen, iha Distritu Bobonaro.

### **Akuzasaun Prokuradór**

Prokuradór akuza katak hahu hosi fulan Juñu tinan 2017, arguidu sai hosi uma no desde arguidu sai hosi uma ne'e, arguidu nunca fó alimentasaun no nesesidade baziku lor-loron ba nia oan nain ida ne'ebé sei idade menoridade.

Prokuradór akuza arguidu kontra artigu 225 KP kona-ba la halotuir obrigasaun alimentár ne'ebé ho moldura penál to' o tinan 3 ka multa.

### **Produsaun ba prova sira**

Antes tama ba produsaun ba prova sira, tribunál bazeia ba artigu 262 KPP kona-ba tentativa ba konsiliaun, husu atu halo tentativa konsiliaun ba parte rua.

Iha prosesu konsiliaun ne'e, lezada hakarak deziste fali nia keixa hasoru arguidu ho kritería katak arguidu tenke fó alimentasaun ba sira nia oan. Arguidu ne'ebé dezempregu prontu fó alimentasaun ba nia oan ne'e US\$ 15.00 kada fulan. Lezada konkorda ho montante ne'e no hakarak deziste tiha keixa hasoru arguidu.

### **Alegasaun final**

Prokuradór no defeza konkorda ho akordu dame ne'ebé parte rua konkorda ona no husu ba tribunál atu omologa prosesu ne'e.

### **Desizaun**

Bazeia ba akordu hosi parte sira no pedidu dezisténsia hosi lezada, tribunál omologa prosesu ne'e ho kondisaun ida katak arguidu tenke kumpri nia promesa tuir akordu ne'ebé parte rua halo perante tribunál.

## **17. Krime ofensa ba integridade fízika simples ho natureza violénsia doméstika**

Nú. Prosesu	: 0071 /15. BBMLV
Kompozisaun Tribunál	: Singulár
Juis	: Dr. Nasson Sarmiento
Prokuradór	: Dr. Napoleão da Silva Soares
Defeza	: Dr. Albano Maia (advogadu estajiáriu)
Tipu pena	: Pena prizaun fulan 3 suspende ba tinan 1

Iha 26 Jullu 2018, Tribunál Distritál Suai liuhosi tribunál movel iha Distritu Bobonaro prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu MdJ hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 29 Setembru 2016, tuku 19.00 kalan, arguidu tebe dala ida iha lezada nia knosen-loos no rezulta moras no bubu. Antes ne'e, aguidu no lezada diskute malu tanba arguidu lakohi ona lezada no haruka lezada fila ona Manatuto ho lezada nia inan maibé lezada lakohi. Tanba ne'e, sira diskute malu to' o arguidu halo agresaun fízika hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa totalmente ba faktu sira iha akuzasaun no deklarata katak arrepende ona ninia hahalok ne'e. Arguidu mós deklarata katak nia foin primeiravés hatan iha tribunál. Aleinde ne'e, lezada kontinua reforsa faktu sira iha akuzasaun no deklarata katak sira diak malu fali ona to'ó agora arguidu la baku ona lezada.

### **Alegasaun finál**

Prokuradór konsidera arguidu provadu komete krime hasoru lezada. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida.

Enkuantu, defeza husu ba tribunál atu kondena arguida ho pena ne'ebé adekuaudu tanba arguidu konfesa, arrepende ninia hahalok no diak malu ona ho lezada.

### **Desizaun**

Depoide avalia faktu provadu sira hotu, tribunál konsidera akuzasaun prokuradór nian provadu hotu. Bazeia ba prova hirak ne'e no tetu ba sirkunstánsia sira hotu, tribunál kondena arguidu ho pena prizaun fulan tolu suspende ba tinan ida inklui kondena arguidu selu kustu judisiál US\$10.00.

### **18. Krime interruptsaun ba gravidéz**

Nú. Prosesu	: 0007/16.BLLT
Kompozisaun Tribunál	: Singulár
Juis	: Dr. Nasson M.B. Sarmiento
Prokuradór	: Dr. Napoleão Soares da Silva
Defeza	: Dr. Escolástico da Costa N. Maia (advogadu privadu estajiáriu)
Tipu pena	: Pena prizaun tinan 1 fulan 6 suspende ba tinan 2 fulan 6

Iha 26 Jullu 2018, Tribunál Distritál Suai liuhosi julgamentu movel iha Distritu Bobonaro prezide leitura sentensa ba krime interruptsaun ba grávides (abortu) ne'ebé envolve arguidu AB no arguida IMG, iha Distritu Bobonaro.

### **Akuzasaun Prokuradór**

Prokuradór akuza katak arguidu AB iha ona feen no arguida hanesan fetu faluk. Arguida no arguidu namora desde tinan 2005 no relasaun ne'e sira ninia familia la hatene. Iha tinan 2016, arguida isin rua no sira decide atu halo abortu tiha bebe ne'e. Nune'e, iha 20 Juñu 2016,

arguida no arguidu ba iha arguidu ninia to'os no arguidu buti arguida ninia kabun to'o ran sai barak. Arguida fila ba uma no partu bebe ida ho kondisaun mate kedas iha kabun laran.

Prokuradór akuza arguidu kontra artigu 141 alinea (2) KP kona-ba interrupsaun ba grávidez ho moldura penál to'o tinan 3.

### **Produsaun ba prova sira**

Iha prosesu julgamentu, arguidu ho arguida konfesa sira ninia hahalok no deklarata katak sira arrepende ba sira ninia hahalok ne'e. Arguidu no arguida mós deklarata katak sira iha duni relasaun namora no iha momentu ne'ebá arguida isin rua fulan neen ona, tanba mo'e ho família nune'e sira buka meius atu halo abortu tiha bebe ne'ebé iha hela arguida nia isin. Arguidu buti arguida nia kabun no liutiha semana ida mak arguida foin abortu.

### **Alegasaun finál**

Prokuradór konsidera arguidu ho arguida provadu komete krime tuir faktu sira iha akuzasaun. Tanba ne'e, maske arguidu no arguida arrepende ona sira ninia hahalok, arguidu iha oan na'in walu no arguida iha oan rua, prokuradór nafatin husu ba tribunál atu kondena arguidu ho pena prizaun tinan rua suspende ba tinan tolu.

Entretantu, defeza husu ba tribunál atu kondena arguidu ho arguida ho pena ne'ebé kmaan, tanba arguidu ho arguida konfesa hotu faktu sira iha akuzasaun, arrepende ba sira ninia hahalok no iha responsabilidade ba oan sira.

### **Desizaun**

Tribunál prova katak arguidu ho arguida komete duni krime tuir faktu sira iha akuzasaun. Tanba ne'e, tribunál kondena arguidu ho arguida ho pena prizaun tinan ida fulan neen suspende ba tinan rua fulan neen.

## **19. Krime ofensa ba integridade fízika simples ho natureza violénsia doméstika**

Nú. Prosesu	: 0006/16.BBBBV
Kompozisaun Tribunál	: Singulár
Juis	: Dr. Samuel Pacheco
Prokuradór	: Dr. Matias Soares
Defeza	: Dr. Domingos dos Santos (advogadu privadu estajáriu)
Tipu pena	: Pena prizaun tinan 1 suspende ba tinan 1

Iha 26 Jullu 2018, Tribunál Distritál Suai liuhosi julgamentu movel iha Distritu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AM hasoru nia feen, iha Distritu Bobonaro.



### **Akuzasaun Prokuradór**

Prokuradór akuza katak iha 02 Outubru 2016, maizumenus iha tuku 09.00 dader, arguidu basa dala rua iha lezada ninia hasan-karuuk, hiit lezada nia kalilin no riba lezada ba rai. Antes ne'e, arguidu hirus tanba lezada fila tarde lori malus atu kose ba sira nia oan ne'ebé moras hela.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira iha akuzasaun no deklarata katak sira rezolve ona problema ne'e tuir kustume Timor ninian. Arguidu deklarata katak sira fahe malu ona no arguidu fó karau vaka ida no osan US\$1,000.00 ba família lezada nian. Entretantu, família lezada nian fó tais ida, foos karon ida ho biskuat pak ida.

Aleinde ne'e, lezada kontinua konfirma faktu sira iha akuzasaun no deklarata katak sira separa ona nu'udar feen no laen.

### **Alegasaun finál**

Prokuradór konsidera arguidu provadu komete krime hasoru lezada, nune'e maske sira separa ona nu'udar feen no laen, maibé tanba atu halo prevensaun ba arguidu atu la komete tan aktu ne'e hasoru lezada ka ema seluk iha futuru, husu ba tribunál atu kondena arguidu ho pena prizaun tinan ida suspende ba tinan rua.

Entretantu, defeza husu ba tribunál atu kondena arguidu ho suspensaun ba pena prizaun maibé menus hosi prokuradór nia alegasaun tanba konsidera arguidu arrepende ninia hahalok, promete sei la komete tan krime hasoru lezada iha futuru no tanba arguidu rasik separa ona ho lezada.

### **Desizaun**

Depoizde avalia faktu sira, tribunál prova katak arguidu komete duni krime tuir faktu sira iha akuzasaun. Bazeia ba prova hirak ne'e, tribunál kondena arguidu ho pena prizaun tinan ida suspende ba tinan ida inklui kondena arguidu selu kustu judisiál US\$10.00.

### **20. Krime ofensa ba integridade fízika simples (rita)**

Nú. Prosesu	: 0037/17.BBMLV
Kompozisaun Tribunál	: Singulár
Juis	: Dr. Samuel Pacheco
Prokuradór	: Dr. Matias Soares
Defeza	: Dr Escolatico da Costa N. Maia (advogadu privadu estajiáriu)
Tipu pena	: Omologa dezisténsia keixa

Iha 26 Jullu 2018, Tribunál Distritál Suai liuhosi julgamentu movel iha Distritu Bobonaro prezide julgamentu tentativa konsiliaisaun ba krime ofensa ba integridade fízika simples ne'ebé envolve arguidu Moises Bere Mau Natalino hasoru Longinhos Carvalho, iha Distritu Bobonaro.

### **Akuzasaun Prokuradór**

Prokuradór akuza arguidu katak iha 14 Maiu 2017, maizumenus iha tuku 17.00 lokraik, arguidu la kolia buat ruma, kaer lezadu nia faru gola, hiit sae lezadu no tuku dala ida iha lezadu ninia reen-toos no halo lezadu monu ba rai. Bainhira lezadu monu ba rai ne'e, arguidu hanehan lezadu nia kotuk-aran ho arguidu nia ain-tuur no tuku dala rua iha lezadu nia ulun, dala rua iha kotuk laran no tebe dala ida iha lezadu nia kidan-karuuk. Antes ne'e, iha maizumenus iha tuku 16.00 lokraik lezadu ba hatama bee ba nia natar no hein iha ne'ebá. Liutiha oras ida, arguidu ba no komete krime ne'e hasoru lezadu. Depois akontesimentu ne'e lezadu ba halo kedas tratamentu iha Ospital Maliana.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaisaun, juis husu atu halo tentativa konsiliaisaun ba arguidu no lezadu.

Iha prosesu konsiliaisaun ne'e, lezadu hakarak deziste tiha keixa hasoru arguidu tanba arguidu arrepende ona ninia hahalok. Arguidu mós husu deskulpa ba lezadu no promete sei la komete tan krime hasoru lezadu iha futuro.

### **Alegasaun final**

Prokuradór no defeza konkorda ho parte rua nia akordu dame no husu ba tribunál atu omologa prosesu ne'e.

### **Desizaun**

Bazeia ba pedidu dezisténsia hosi lezadu no akordu dame hosi parte sira, tribunál omologa dezisténsia keixa ne'e.

## **21. Krime ofensa ba integridade fízika simples no danu simples**

Nú. Prosesu	: 0030/17.CVSUI
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Napoleão da Silva Soares
Defeza	: Dr. Albano Maia (advogadu privadu estajáriu)
Tipu pena	: Omologa pedidu dezisténsia keixa

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba krime ofensa ba integridade fízika simples no danu simples ne'ebé envolve arguidu Amaro Martins da Silva hasoru Acasio da Silva, iha Distritu Covalima.

### **Akuzasaun Prokuradór**

Prokuradór akuza katak iha 18 Abril 2017, lezadu ho kareta hosi dirasaun Dili – Suai, bainhira to'ó iha Suku Camanasa, lezadu hasoru malu ho arguidu ne'ebé kondus motorizada. Lezadu apita atu arguidu fó dalan ba lezadu atu liu maibé arguidu la fó dalan. Arguidu para tiha nia motor no tun hosi nia motor ba tuku dala barak iha lezadu nia ulun, hasan no tilun-hun. Aleinde ne'e, arguidu tuku rahun kareta nia espelu sorin-loos. Aktu hirak ne'e rezulta bubu iha lezadu nia ulun no tilun-hun.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 258 KP kona-ba danu simples ho moldura penál to'ó tinan 3 ka multa.

### **Produsaun ba prova sira**

Bazeia ba artigu 262 KPP kona-ba tentativa ba konsiliaun, no tanba ne'e antes tama ba produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fila fali keixa ho kritéria katak arguidu tenke selu fila fali nia sofrimentu no espellu ne'ebé rahun ho osan US\$200.00. Arguidu konkorda ho lezadu nia pedidu ne'e no deklara katak arrepende ba ninia hahalok no promete sei la halo tan krime ne'e iha futuru hasoru lezadu no ba ema seluk.

### **Alegasaun finál**

Prokuradór no defeza konkorda ho parte rua nia akordu dame no husu ba tribunál atu omologa prosesu ne'e.

### **Desizaun**

Bazeia ba pedidu dezisténsia hosi lezadu no akordu dame hosi parte sira, tribunál omologa dezisténsia keixa ne'e.

## **22. Krime ofensa ba integridade fízika simples ho natureza violénsia doméstika**

Nú. Prosesu	: 0124 /16. BBMLV
Kompozisaun Tribunál	: Singulár
Juis	: Dr. Nasson Sarmiento
Prokuradór	: Dr. João Marques
Defeza	: Dr. Albano Maia (advogadu estajiáriu)
Tipu pena	: Pena prizaun tinan 1 suspende ba tinan 1

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro, prezide leitura sentesa ba krime ofensa ba integridade fízika simples ho natureza violénsia doméstika envolve arguidu ASM hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 29 Setembru 2017, tuku 15.00 lokraik, arguidu tuku dala ida iha lezada nia kidan parte loos to'o lezada monu ba rai. Antes ne'e, arguidu obriga lezada ho nia inan fila ba Ermera tanba nia inan diak ona hosi moras. Maibé lezada rejeita tanba tuir lezada, nia inan seidauk diak, nune'e mosu diskute malu to'o arguidu komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa katak nia baku duni lezada tuir faktu iha akuzasaun maibé agora dadaun sira diak malu fali ona no to'o agora arguidu la baku ona lezada. Arguidu mós deklarata katak arrepende ona nia hahalok no foin primeiravés hatan iha tribunál. Aleinde ne'e, lezada konfirma faktu sira iha akuzasaun no deklarata katak to'o sira moris dame hanesan feen no laen to'o agora.

### **Alegasaun final**

Prokuradór haktuir katak arguidu provadu komete krime hasoru lezada no agora dadaun sira diak malu ona. Maske nune'e, atu eduka comunidade sira atu hadok-an hosi krime ne'e, husu ba tribunál kondena arguidu ho pena prizaun fulan neen suspende ba tinan ida.

Enkuantu, defeza husu ba tribunál atu kondena arguidu ho pena ne'ebé adekua tanba arguidu konfesa, arrepende ona ninia hahalok no diak malu ona ho lezada.

### **Desizaun**

Depoide avalia faktu sira ne'ebé prodús durante julgamentu, tribunál konsidera katak arguidu provadu komente krime hasoru lezada. Bazeia ba prova hirak ne'e inklui sirkunstánsia sira relasionadu ho krime ne'e, tribunál kondena arguidu ho pena prizaun tinan ida suspende ba tinan ida no kondena arguidu selu kustu judisiál US\$10.00.

### **23. Krime ofensa ba integridade fízika simples ho natureza violénsia doméstika**

Nú. Prosesu	: 0038 /17. BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. João Marques
Defeza	: Albino de Jesus Pereira
Tipu pena	: Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu AdS hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 26 Maiu 2017, arguidu uza sintu baku dala haat iha lezada nia kabaas rezulta bubu. Antes ne'e, arguidu haruka lezada ba *cek-up* iha ospítal maibé lezada la ba no ba fali iha Kailako.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa katak nia baku duni lezada dala haat ho sintu. Maibé arguidu arrepende ba ninia hahalok ne'e. Arguidu deklara mós katak nia foin primeiravés hatan iha tribunál. Aleinde ne'e lezada kontinua reforsa no konfirma ho faktu sira iha akuzasaun prokuradór nian.

### **Alegasaun finál**

Prokuradór haktuir katak arguidu komete duni krime hasoru lezada. Tanba ne'e husu ba tribunál atu kondena arguidu ho pena prizaun fulan neen suspende ba tinan ida no husu atu arguidu selu kustu judisiál US\$25.00.

Iha parte seluk, defeza husu ba tribunál atu kondena arguidu ho pena ne'ebé adekuaudu tanba konsidera sirkunstánsia atenuante sira hanesan arguidu konfesa, arrepende ninia hahalok no dame malu ona ho lezada.

### **Desizaun**

Depoide avalia faktu sira hotu, tribunál prova katak arguidu komete duni krime hasoru lezada. Tanba ne'e, tribunál konklui no kondena arguidu ho pena prizaun fulan 6 suspende ba tinan 1 inklui kondena arguidu selu kustu judisiál US\$25.00.

### **24. Krime la halotuir obrigasaun alimentár**

Nú. Prosesu	: 0092/15.BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Matias Soares
Defeza	: Dra. Tomasia Maria de Deus (advogadu estajiária)
Tipu pena	: Omologa dezisténsia keixa

Iha 27 Jullu 2018, Tribunál Distritál Suai liuhosi tribunál movei iha Distritu Bobonaro prezide leitura sentesa ba krime la halotuir obrigasaun alimentár ne'ebé envolve arguidu JdC hasoru nia oan no feen, iha Distritu Bobonaro.

### **Akuzasaun Prokuradór**

Prokuradór akuza katak iha tinan 2015, arguidu sai hosi uma no desde arguidu sai hosi uma ne'e, arguidu nunca fó alimentasaun ba nia oan nain ida ne'ebé sei idade menoridade.

Prokuradór akuza arguidu kontra artigu 225 KP kona-ba krime la halotuir obrigasaun alimentár ho moldura penál to'o tinan 3 ka multa.

### **Produsaun ba prova sira**

Iha prosesu konsiliaun ne'e, lezada hakarak deziste fali nia keixa hasoru arguidu ho kritéria katak arguidu tenke fó alimentasaun ba sira nia oan. Arguidu konkorda ho pedidu ne'e no prontu fó osan US\$25.00 kada fulan ba nia oan ne'e no lezada konkorda ho montante ne'e.

### **Alegasaun final**

Prokuradór no defeza konkorda ho akordu ne'ebé parte rua deside ona no husu atu omologa akordu ne'e no absolve arguidu.

### **Desizaun**

Bazeia ba akordu hosi parte sira no pedidu dezisténsia hosi lezada, tribunál omologa prosesu ne'e ho kondisaun ida katak arguidu tenke kumpri nia promesa tuir akordu ne'ebé parte rua halo perante tribunál.

### **25. Krime la halotuir obrigasaun alimentár**

Nú. Prosesu	: 0025/18.PDSUA
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Napoleão da Silva Soares
Defeza	: Dr. Manuel Amaral
Tipu pena	: Omologa dezisténsia keixa

Iha 27 Jullu 2018, Tribunál Distritál Suai liuhosi tribunál movei iha Distritu Bobonaro prezide leitura sentesa ba krime la halotuir obrigasaun alimentár ne'ebé envolve arguidu BR hasoru oan no feen, iha Distritu Bobonaro.

### **Akuzasaun Prokuradór**

Prokuradór akuza katak arguidu la fó alimentasaun ba nia oan ho idade menoridade desde arguidu sai hosi uma iha tinan 2016.

Prokuradór akuza arguidu kontra artigu 225 KP kona-ba krime la halotuir obrigasaun alimentár ho moldura penál to'o tinan 3 ka multa.

### **Produsaun ba prova sira**

Iha prosesu julgamentu ne'e, arguidu prontu fó osan US\$50.00 kada fulan ba nia oan. Lezada konkorda ho montante ne'e no hakarak dezisté tiha keixa hasoru arguidu.

### **Alegasaun final**

Prokuradór no defeza konkorda ho akordu dame ne'ebé parte rua konkorda ona no husu ba tribunál atu omologa prosesu ne'e.

### **Desizaun**

Bazeia ba akordu dame hosi parte sira no arguidu ninia komprimisu atu kumpre nia obrigasaun alementár ba nia oan sira no pedidu dezisténsia hosi lezada, tribunál omologa prosesu ne'e.

### **26. Krime omisídiu negligente**

Nú. Prosesu	: 0030/17.BBSTR
Kompozisaun Tribunál	: Singulár
Juis	: Dra. Florensia Freitas
Prokuradór	: Dr. João Marques
Defeza	: Dr. Escolástico da C. N. Maia (advogadu privadu estajáriu)
Tipu pena	: Pena prizaun tinan 2 suspende ba tinan 3 no indemnizasaun sivil

Iha 27 Jullu 2018, Tribunál Distritál Suai liuhosi julgamentu movel iha Distritu Bobonaro prezide leitura sentensa ba krime omisídiu negligente ne'ebé envolve arguidu Delfin Jeremias hasoru lezadu Adelino de Fatima Fernandes, iha Distritu Bobonaro.

### **Akuzasaun Prokuradór**

Prokuradór akuza katak iha 23 Juñu 2017, maizumenus iha tuku 13.45 meudia, arguidu konduz kareta marka Isuzu ho xapa martikula 56.4805, hosi dirasaun Kailaku-Bobonaro. Arguidu tula militantes partidu Fretilin nian. Bainhira to'o iha Maliana iha loja ida nia oin derepente arguidu soke lezadu ne'ebé konduz hela motorizada. Arguidu rona militante sira iha kareta leten hakilar katak ema mate, arguidu tauk no tuun hosi kareta no entrega-an kedas ba iha polísia Eskuadra Maliana. Hafoin ida-ne'e polísia prende kedas kareta ne'ebé arguidu lori.

Relasiona ho akontesimentu ne'e, arguidu nia patraun entrega osan US\$4,000.00 no karau vaka rua ba família matebian maibé família matebian la simu no hakarak osan US\$8,000.00.

Prokuradór akuza arguidu kontra artigu 140 KP kona-ba omisídiu negligénte ho moldura penál to' o tinan 4 ka multa.

### **Produsaun ba prova sira**

Iha prosesu julgamentu arguidu konfesa faktu sira hotu no deklara katak nia lori ona kareta durante tinan lima ona.

Testemuña Gilberto Borges nu'udar kareta na'in depoimenta katak bainhira nia rona arguidu soke mate ema, testemuña ho vontade rasik lori osan US\$4,000.00 no karau vaka rua ba iha mate uma maibé família matebian lakohi simu no hakarak osan US\$8,000.00. Testemuña hatutan katak agora dadaun nia prontu atu fó osan US\$2,000.00 no karau vaka rua ba família matebian.

Entretantu, testemuña ne'ebé nu'udar lezadu nia feen depoimenta katak nia la simu osan US\$4,000.00 no karau rua refere tanba arguidu ne'ebé soke mate lezadu, la marka prezensa iha mate uma. Maibé testemuña hatutan katak agora dadaun nia prontu simu osan US\$2,000.00 no karau vaka rua ne'ebé kareta na'in promete atu fó ne'e.

### **Alegasaun finál**

Prokuradór konsidera arguidu provadu komete krime omisídiu negligente hasoru lezadu tanba ne'e maske arguidu arrepende ninia hahalok, prokuradór mantein husu ba tribunál atu kondena arguidu ho pena prizaun tinan rua suspende ba tinan tolu.

Entretantu kareta ne'ebé prende hela iha eskuadra polísia Maliana, sei entrega fila fali, bainhira arguidu kumpri ona nia promesa, entrega osan US\$2,000.00 no karau vaka rua ba família matebian.

Aleinde ne'e, defeza mós husu ba tribunál atu kondena arguidu ho pena prizaun maibé suspende ninia ezekusaun maibé menus hosi prokuradór nia alegasaun. Defeza husu pena refere tanba arguidu arrepende no arguidu laiha intensaun atu soke lezadu.

### **Desizaun**

Depoizde avalia faktu sira hotu, tribunál prova katak arguidu soke mate duni lezadu. Tanba ne'e, tribunál kondena arguidu ho pena prizaun tinan rua suspende ba tinan tolu inklui arguidu liuhosi nia patraun entrega osan US\$2,000.00 no karau vaka rua ba lezadu nia feen.

### **27. Krime furtu simples**

Nú. Prosesu : 0125/17.PDSU  
Kompozisaun Tribunál : Singulár  
Juis : Dra. Florensia Freitas  
Prokuradór : Dr. Matias Soares



Defeza : Fernando da Costa (advogadu estajiáriu)  
Tipu pena : Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi julgamentu movel iha Distritu Bobonaro prezide julgamentu leitura sentensa ba krime furtu simples ne'ebé envolve arguidu Domingos Goveia Lopes hasoru lezada Maria Supriyati, iha Distritu Bobonaro.

### **Akuzasaun Prokuradór**

Prokuradór haktuir katak arguidu no lezada separa ona nu'udar feen no laen. Iha 01 Juñu 2017, iha tuku 16.00 lokraik, arguidu ba iha lezada ninia uma no tama liu ba iha uma laran. Prokuradór akuza katak arguidu foti lezada nia telefone marka nokia ho folin US\$18.00 sein lezada nia koñesimentu.

Prokuradór akuza arguidu kontra artigu 251 KP kona-ba furtu simples ho moldura penál to'ó tinan 3 ka multa.

### **Produsaun ba prova sira**

Iha prosesu julgamentu, arguidu konfesa faktu sira iha akuzasaun no deklarata katak nia arrepende ninia hahalok. Arguidu mós deklarata katak intensaun foti lezada nia telefone atu hare lezada nia foto ho mane seluk. Arguidu mós deklarata katak nia fó fila ona telefone ne'e maibé lezada lakohi simu. Tanba ne'e, arguidu entrega osan US\$20.00 ba lezada.

Aleinde ne'e, lezada mós kontinua konfirma faktu sira iha akuzasaun prokuradór no husu ba tribunál atu bandu arguidu labele ba buka ona problema iha lezada ninia uma tanba durante ne'e arguidu sempre ba buka problema.

### **Alegasaun final**

Prokuradór konsidera arguidu provadu komete krime ne'ebé prokuradór akuza hasoru arguidu. Tanba ne'e maske arguidu arrepende ona ninia hahalok, maibé atu halo prevensaun ba arguidu atu la komete tan aktu ne'e hasoru lezada iha futuru, husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu kondena arguidu ho pena ne'ebé justu, tanba konsidera arguidu konfesa, arrepende ninia hahalok no promete sei la komete tan krime hasoru lezada iha futuru.

### **Desizaun**

Depoisde avalia faktu provadu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Prova mós katak arguidu entrega osan US\$20.00 ba lezada hodi hola fali telefone foun. Bazeia ba prova hirak ne'e, tribunál konklui

prosesu ne'e no kondena arguidu ho pena prizaun fulan neen suspende ba tinan ida no selu kustu judisiál US\$10.00.

## **28. Krime ofensa ba integridade fízika simples**

Nú. Prosesu : 0017/14.BBBBV  
Kompozisaun Tribunál : Singulár  
Juis : Dra. Florensia Freitas  
Prokuradór : Dr. Napoleão Soares da Silva  
Defeza : Dr. Albano Maia (advogadu privadu estajiáriu)  
Tipu pena : Omologa dezisténsia keixa

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Lorencu da Cruz, Guido Celestino no Sebastiao Gonçalves hasoru lezadu Cornelio dos Santos, iha Distritu Bobonaro.

### **Akuzasaun Prokuradór**

Prokuradór akuza katak iha 02 Novembru 2017, maizumenus iha tuku 19.00 kalan, lezadu hemu hela tua iha nia uma. Arguidu Lorencu hanesan xefe suku konvida lezadu atu kontinua ba hemu hamutuk ho sira nia kolega ida naran Sabino. Lezadu hatan ba arguidu katak arguidu nu'udar ukun na'in ida maibé beik-ten tanba haruka fali nia ba hemu tan tua.

Hafoin kolia hanesan ne'e, arguidu sira foti ai baku lezadu nia reen-toos, baku iha liman dala ida, baku lezadu nia ain-tuur dala ida halo lezadu monu ba rai. Bainhira lezadu monu ba rai, arguidu sira tuku dala barak iha lezadu nia isin-lolon no rasta lezadu ba iha estrada klaran to lezadu desmaia. Depoisde ne'e, lezadu hader fali rasik no ba halo tratamentu iha ospital.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Antes tama ba produsaun ba prova sira, bazeia ba artigu 262 Kódigu Prosesu Penál kona-ba tentativa ba konsiliaun, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, lezadu hakarak deziste tiha keixa hasoru arguidu sira. Arguidu sira mós husu deskulpa ba lezadu no deklara katak arrepende ona sira ninia hahalok. Arguidu sira mós promete sei la komete tan krime hasoru lezadu iha futuru.

### **Alegasaun final**

Prokuradór no defeza konkorda ho parte rua nia akordu dame no husu ba tribunál atu omologa prosesu ne'e.

## **Desizaun**

Bazeia ba pedidu dezisténsia hosi lezadu no akordu dame hosi parte sira, tribunál omologa dezisténsia keixa ne'e.

### **29. Krime ofensa ba integridade fízika simples ho natureza violénsia doméstika**

Nú. Prosesu : 0018/17.BBCLC  
Kompozisaun Tribunál : Singulár  
Juis : Dra. Florensia Freitas  
Prokuradór : Dr. João Martins  
Defeza : Dr. Abilio Soares da Costa (advogadu privadu estajiáriu)  
Tipu pena : Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi julgamentu movel iha Distritu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 17 Setembru 2017, maizumenus iha tuku 13.00 meudia, arguidu tuku dala ida iha lezada kanuruk no tuku dala ida iha kidan sorin-karuuk. Aktu ne'e rezulta lezada tenke ba halo tratamentu iha klínika Kailaku.

Antes ne'e, lezada ko'us hela sira nia oan no arguidu hasai nia faru no soe ba lezada ninia leten. Lezada foti fali faru ne'e no soe fila fila ba arguidu ninia kabaas, nune'e arguidu husu ba lezada katak lezada so'e duni ona nia ropa ka?. Lezada hatan ba arguidu katak nia la soe ida, nia halimar deit. Maibé arguidu dehan ba lezada katak lezada bulak nanis ona. Lezada la simu no so'e tiha arguidu nia telefone ba rai to'o nakfera nune'e arguidu komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira iha akuzasaun no deklarata katak nia arrende ninia hahalok. Arguidu mós deklarata katak liutiha semana ida hosi akontesimentu ne'e, sira foin diak malu. Aleinde ne'e, arguidu deklarata katak nia la baku tan ona lezada. Iha parte seluk, lezada kontinua konfirma no reforsa faktu sira iha akuzasaun prokuradór no deklarata katak arguidu mak sustensa sira nain neen.

### **Alegasaun final**

Prokuradór konsidera arguidu provadu komete krime hasoru lezada. Tanba ne'e atu halo prevensaun ba arguidu atu la komete tan aktu ne'e hasoru lezada iha futuru, husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza husu ba tribunál atu kondena arguidu ho pena ne'ebé justu, tanba konsidera arguidu konfesa, arrepende ninia hahalok no promete sei la komete tan krime hasoru lezada iha futuru. Aleinde ne'e, arguidu ho lezada mós diak malu ona sira mós iha oan nain lima.

### **Desizaun**

Depoizde avalia faktu provadu sira hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu hirak ne'e, tribunál kondena arguidu ho pena prizaun fulan neen suspende ba tinan ida no selu kustu judisiál US\$10.00.

### **30. Krime ofensa ba integridade física simples ho natureza violência doméstica**

Nú. Prosesu	: 0002/16.BBMLV
Kompozisaun Tribunál	: Singulár
Juis	: Dra. Florensia Freitas
Prokuradór	: Dr. João Marques
Defeza	: Dr. Escolástico da Costa N. Maia (advogadu privadu estajáriu)
Tipu pena	: Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu SdS hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 02 Janeiru 2015, maizumenus iha tuku 11.30 meudia, arguidu basa dala tolu iha lezada nia hasan, kakorok no kotuk laran.

Antes ne'e, lezada haruka arguidu atu ko'us sira nia oan ne'ebé sofre kabun moras, maibé arguidu lakohi ko'us. Aleinde ne'e, lezada husu osan US\$10.00 ba arguidu maibé arguidu la fó. Tanba ne'e, lezada hirus no basa fali sira nia oan mane boot nia ulun no arguidu komete krime refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu sira iha akuzasaun no deklarata katak nia arrepende ninia hahalok. Arguidu mós deklarata katak sira diak malu ona no arguidu la baku tan ona lezada. Aleinde ne'e, lezada kontinua konfirma faktu sira iha akuzasaun prokuradór no deklarata katak arguidu mak durante ne'e sustensa família.

### **Alegasaun final**

Prokuradór husu ba tribunál atu kondena arguidu ho pena prizaun fulan neen suspende ba tinan ida nu'udar meius ida atu prevene arguidu la komete tan aktu ne'e hasoru lezada iha futuru.

Entretantu, defeza husu ba tribunál atu kondena arguidu ho pena ne'ebé justu, tanba konsidera arguidu konfesa, arrepende ninia hahalok no promete sei la komete tan krime hasoru lezada iha futuru. Aleinde ne'e, arguidu ho lezada mós diak malu ona sira mós iha oan nain rua ne'ebé prezisa arguidu nia prezensa.

### **Desizaun**

Depoizide avalia faktu provadu sira hosi kazu ne'e, tribunál konklui katak arguidu provadu komete duni krime tuir faktu sira iha akuzasaun no kondena arguidu ho pena prizaun fulan neen suspende ba tinan ida.

### **31. Krime ofensa ba integridade física simples ho natureza violência doméstica**

Nú. Prosesu	: 0007/17.BBCLC
Kompozisaun Tribunál	: Singulár
Juis	: Dra. Florensia Freitas
Prokuradór	: Dr. João Marques
Defeza	: Dra. Tomasia Maria de Deus (advogada privada estajária)
Tipu pena	: Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi tribunál movel iha Distritu Bobonaro prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu AI hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 16 Jullu 2017, maizumenus iha tuku 16.00 madrugada, arguidu rasta lezada nia fuuk no riba lezada ba rai. Arguidu tebe dala ida iha lezada nia kabun sorin-karuuk, kaer iha lezada nia fuuk no basa dala rua iha lezada nia hasan-loos no karuuk. Antes ne'e, arguidu hemu hela tua ho nia kolega ida no sira na'in rua baku malu. Nune'e, lezada ho ninia família tenta hafahe arguidu no nia kolega ne'e, maibé arguidu halo fali agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu sira iha akuzasaun no deklara katak nia arrepende ninia hahalok. Arguidu promete sei la repete ninia hahalok iha futuro. Arguidu mós deklara katak problema ne'e sira rezolve ona tuir kustume Timor nian no arguidu fó belak ida no karau ida ba lezada nia família. Entretantu lezada nia família fó fahi ida ba arguidu nia família.

Aleinde ne'e, lezada kontinua konfirma faktu sira iha akuzasaun no deklara katak sira moris nu'udar feen no laen, iha oan na'in lima no to'o arguidu la repete ninia hahalok krime hasoru lezada.

### **Alegasaun final**

Prokuradór husu ba tribunál atu kondena arguidu ho pena prizaun fulan neen suspende ba tinan ida tanba konsidera arguidu komete duni krime hasoru lezada. Prokuradór konsidera pena ne'e nu'udar prevensaun ida ba arguidu atu la repete ninia hahalok ne'e hasoru lezada iha futuro.

Entretantu, defeza husu ba tribunál atu kondena arguidu ho pena ne'ebé justu, tanba konsidera sirkunstánsia atenuante sira hanesan arguidu konfesa, arrepende ninia hahalok no promete sei la komete tan krime hasoru lezada iha futuro.

### **Desizaun**

Depoizde avalia faktu sira ne'ebé prodús durante julgamentu, tribunál prova katak arguidu komete duni krime tuir faktu sira iha akuzasaun. Bazeia ba prova hirak ne'e, tribunál kondena arguidu ho pena prizaun fulan neen suspende ba tinan ida.

### **32. Krime ofensa ba integridade fízika simples ho natureza violénsia doméstika**

Nú. Prosesu	: 0065/17.BBMLV
Kompozisaun Tribunál	: Singulár
Juis	: Dra. Florensia Freitas
Prokuradór	: Dr. João Marques
Defeza	: Dr. Escolástico da C. N. Maia
Tipu pena	: Pena prizaun fulan 6 suspende ba tinan 1

Iha 27 Jullu 2018, Tribunál Distritál Suai liuhosi tribunál movei iha Distritu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LH hasoru nia feen, iha Distritu Bobonaro.

### **Akuzasaun Prokuradór**

Prokuradór akuza katak iha 18 Jullu 2017, maizumenus iha tuku 21.00 kalan, arguidu basa dala ida iha lezada nia hasan-loos no foti kadeira ai ida baku dala ida iha lezada ninia ulun kotuk parte sorin. Aktu hirak ne'e rezulta kanek no ran. Antes ne'e, lezada, arguidu no sira nia oan mane akompaña hela notisia iha TVTL. Iha momentu refere, lezada ho arguidu aproveita koalia kona-ba sira nia oan mane nia lia. Bainhira koalia ne'e, arguidu no lezada nia liafuan la han malu nune'e arguidu komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu arguidu konfesa faktu sira iha akuzasaun no deklarata katak nia arrepende ninia hahalok. Arguidu mós deklarata katak problema ne'e sira rezolve ona tuir kustume Timor nian no arguidu fó ona belak ida ho karau ida ba lezada ninia família. Aleinde ne'e, lezada kontinua konfirma no reforsa faktu sira iha akuzasaun prokuradór no deklarata katak sira diak malu ona.

### **Alegasaun finál**

Prokuradór konsidera arguidu provadu komete krime hasoru lezada. Tanba ne'e maske sira diak malu ona no rezolve ona kazu ne'e liuhosi kustume Timor nian maibé atu halo prevensaun ba arguidu atu la komete tan aktu hirak ne'e hasoru lezada iha futuru, husu ba tribunál atu kondena arguidu ho pena multa US\$90.00. Pena multa ne'e sei selu US\$1.00 kada loron durante loron 90. Bainhira arguidu la selu pena multa ne'e, husu ba tribunál atu kondena arguidu ho pena alternativa durante fulan tolu iha prizaun.

Entretantu, defeza husu ba tribunál atu kondena arguidu ho pena ne'ebé justu, tanba arguidu konfesa, arrepende ninia hahalok no promete sei la komete tan krime hasoru lezada iha futuru. Aleinde ne'e, defeza mós konsidera katak arguidu ho lezada diak malu ona rezolve ona kazu ne'e liuhosi kustume Timor nian no arguidu rasik mak sustenta nia oan na'in hitu.

### **Desizaun**

Depoide avalia faktu provadu sira, tribunál prova katak arguidu komete duni krime tuir faktu sira iha akuzasaun. Tanba ne'e, tribunál konklui no kondena arguidu ho pena prizaun fulan neen suspende ba tinan ida.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.tl](mailto:luis@jsmp.tl)

[www.jsmp.tl](http://www.jsmp.tl)

Telephone:3323883| 77295795